

## თბილისის “დინამო” – ნახევარფინალში

თბილისის ვ. ი. ლენინის სახელობის “დინამოს” სტადიონი. 20 მარტი.

“დინამო” (თბილისი) – “კრილია სოვეტოვი” (კუიბიშევი) 2:0 (1:0).

“დინამო”: გაბელია (მამინაშვილი), კოსტავა, კანთელაძე, ჩივაძე, გ. მაჩაიძე, დარასელია (მინაშვილი), მ. მაჩაიძე, ქორიძე, გუცაევი, ჭილაია, შენგელია (ჩელევაძე).

“კრილია სოვეტოვი”: ლისენჩუკი, ლოსიევი, კუპრიანოვი, როტენკო, არუთინიანი, პანფილოვი, ელისიევი (სიდოროვი), ბიტკინი, მინაევი, პილიპუკო, ფეტისოვი.

მსაჯი: ა. კადეტოვი (მოსკოვი).

გოლები: ვ. ქორიძე (მე-10 წ.), მ. მაჩაიძე (57).

გატრთხილებულია კუპრიანოვი.

ისევე როგორც წინა სათასო შეხვედრებში, “დინამომ” თავიდანვე გადაწყვიტა საქმის მოთავება. მასპინძელთა იერიშები სწრაფი, გააზრებული იყო. სანამ კუიბიშეველებმა ასე თუ ისე მოასწრეს დაცვის ორგანიზება, დამშვიდება და რაიმე საპასუხო საშუალებების გამონახვა, ტაბლოზე ერთიანიც აინთო – მარჯვენა ფლანგიდან ჩამონოღებულ ბურთს ქორიძემ თავით ზუსტი მისამართი მოუძებნა.

ერთხანს კიდევ გაგრძელდა თბილისელთა იერიში, მერე კი ყველაფერი თანდათან ჩანყნარდა. ბურთს მეტწილად “დინამო” ფლობს, ტერიტორიული უპირატესობაც მის მხარესაა, მაგრამ სისწრაფედაკარგული და, რაც მთავარია არცთუ მიზანსწრაფული იერიშები ხან ერთ ფლანგზე ექცევა ჩიხში, ხან – მეორეზე. რა თქმა უნდა, ამგვარ ვითარებაში სტუმრებს უთუოდ შეეძლოთ ხელის გამოღება, მაგრამ თამაშის გამწვავებას რატომღაც თავი აარიდეს. შეიძლება რესურსების უქონლობის გამო, იქნებ იმიტომაც, რომ უბრალოდ არ ისურვეს – შიშს დიდი თვალები აქვსო, ერთადერთი ისევე ფეტისოვი ცდილობდა მასპინძელთა კარისკენ გზის მოძებნას, თუმცა მის ინდივიდუალურ იერიშებს პრაქტიკული შედეგი არ მოჰყოლია.

მეორე ტაიმში თბილისელებს რამდენჯერმე ჰქონდათ ანგარიშის გაზრდის შესაძლებლობა. ერთი მათგანი (სტუმრები უხეში თამაშისთვის დაჯარიმდნენ) მშვენივრად გამოიყენა დინამოელთ კაპიტანმა – მაჩაიძემ ზუსტად და ძლიერად დაარტყა – 2:0. საგოლე მომენტი შექმნეს კუიბიშეველებმაც (თუ არ ვცდები, ერთადერთი) – დარტყმა ოდნავ უზუსტო გამოდგა.

ახლა ბროლის თასისთვის ბრძოლას ოთხი გუნდიღა შემორჩა. ერთი მათგანი თბილისის “დინამოა”. დასაწყისი ძალიან კარგია. ბუნებრივია, არ უნდა გაგვიჩელოს ოპტიმიზმი იმან, რომ ჩვენს გუნდს არც თუ ძლიერი მეტოქენი ჰყავდა. ერთ რომ ზედიზედ ექვსი გამარჯვება თანაც სუსტ კოლექტივებთან არც ისე იოლია, და მეორეც: თბილისელებმა ეს ექვსივე მატჩი, რომ იტყვიან, ცალი ფეხით მოიგეს – ნებისმიერ შეხვედრაში დინამოელები მთელი ენერჯით სულ რაღაც 25–30 წუთს თუ თამაშობდნენ. მწვრთნელებმა ჩემპიონატის დაწყებამდე არა ერთი და ორი ტაქტიკური ვარიანტისა და ახალგაზრდა ფეხბურთელების შემოწმებაც მოახერხეს. ყველაფერი ამის შემდეგ თბილისის “დინამოს” გულშემატკივართ, რაღა თქმა უნდა, იმის სრული უფლება აქვთ, რომ წლევანდელი საფეხბურთო სეზონის ბატალიებს საკმაოდ გაბედული განზრახვებით დაელოდონ.

ბ. ირემაძე.

“ლელო”, 21 მარტი, 1979 წ.